



तमसो मा ज्योतिर्गमय

SANTINIKETAN  
VISWA BHARATI  
LIBRARY

71

4000





ମାତ୍ରମୁତ



# ପତ୍ରପୁଟ

ବ୍ରହ୍ମନାଥ ଡାକ୍ତର



42724

ବିଶ୍ୱଭାରତୀ-ଗ୍ରନ୍ଥାଳୟ

୨୧୦ ନଂ କର୍ମଓଆରମ୍ବ୍ ଟ୍ରୀଟ୍, କଲିକତା

বিশ্বভারতী গ্রন্থন-বিভাগ  
২১০ নং কর্নওয়ালিস স্ট্রীট, কলিকাতা  
প্রকাশক—শ্রীকিশোরীমোহন সাতরা

---

## পত্রপুট

---

প্রথম সংস্করণ	...	২৫শে বৈশাখ, ১৩৪৩
দ্বিতীয় সংস্করণ	...	২৫শে কার্তিক, ১৩৪৫

---

মূল্য—এক টাকা মাত্র

---

শান্তিনিকেতন প্রেস হইতে  
প্রভাতকুমার মুখোপাধ্যায় কর্তৃক মুদ্রিত।

কল্যাণীয় শ্রীমান কৃষ্ণ কুপালানি ও

কল্যাণীয়া শ্রীমতী নন্দিতার

শুভ পরিণয় উপলক্ষ্যে

আশীর্বাদ—

নব জীবনের ক্ষেত্রে ছুজনে মিলিয়া একমনা  
যে নব সংসার তব প্রেমমন্ত্রে করিছ রচনা  
ছুঃখ সেথা দিক্ বীৰ্য, সুখ দিক্ সৌন্দর্যের সুধা,  
মৈত্রীর আসনে সেথা নিক্ স্থান প্রসন্ন বসুধা,  
হৃদয়ের তারে তারে অসংশয় বিশ্বাসের বীণা  
নিয়ত সত্যের সুরে মধুময় করুক আভিনা ।  
সমুদার আমন্ত্রণে মুক্তদ্বার গৃহের ভিতরে  
চিত্ত তব নিখিলের নিত্য যেন আতিথ্য বিতরে ।  
প্রত্যাহের আলিম্পনে দ্বারপথে থাকে যেন লেখা  
সুকল্যাণী দেবতার অদৃশ্য চরণচিহ্নরেখা ।  
শুচি যাহা, পুণ্য যাহা, সুন্দর যা, যাহা কিছু শ্রেয়,  
নিরলস সমাদরে পায় যেন তাহাদের দেয় ।  
তোমার সংসার ঘেরি', নন্দিতা, নন্দিত তব মন  
সরল মাধুর্যরসে নিজেই করুক সমর্পণ ।  
তোমাদের আকাশেতে নির্মল আলোর শব্দনাদ  
তার সাথে মিলে থাক্ দাদামশায়ের আশীর্বাদ ॥

শান্তিনিকেতন

১২ বৈশাখ, ১৩৪৩

রবীন্দ্রনাথ ঠাকুর





## ভূমিক

“পত্রপুটে”-র দ্বিতীয় সংস্করণ প্রকাশিত হইল। ইহাতে,  
যোলো এবং সতেরো সংখ্যক কবিতা দুইটি এবারে নূতন  
যোগ করা হইয়াছে।

২৫শে কার্তিক,

১৩৪৫

প্রকাশক

---



# সূচী

এক	জীবনে নানা স্থখ দুঃখের এলোমেলো ভীড়ের	১
দুই	আমার ছুটি চারদিকে ধু ধু করছে ...	৫
তিন	আজ আমার প্রগতি গ্রহণ করো, পৃথিবী ...	১১
চার	একদিন আঘাতে নামল ...	১৬
পাঁচ	সন্ধ্যা এল চুল এলিয়ে ...	১৯
ছয়	অতিথিবৎসল ...	২৪
সাত	চোখ ঘুমে ভেরে আসে ...	২৬
আট	আমাকে এনে দিল এই বুনো চারাগাছটি ...	৩১
নয়	হেঁকে উঠল ঝড় ...	৩৪
দশ	এই দেহখানা বহন ক'রে আসছে দীর্ঘকাল ...	৩৭
এগারো	ফাস্তনের রঙিন আবেশ ...	৪০
বারো	বসেছি অপরাহ্নে পারের খেয়াঘাটে ...	৪৩
তেরো	হৃদয়ের অসংখ্য অদৃশ্য পত্রপুট ...	৪৮
চোদ্দ	ওগো তরুণী ...	৫২
পনেরো	ওরা অস্ব্যজ, ওরা মস্তবর্জিত ...	৫৪
ষোলো	উদ্ভাস্ত সেই আদিম যুগে ...	৬৩
সতেরো	যুদ্ধের দামামা উঠল বেজে ...	৬৬
আঠারো	কথার উপরে কথা চলেছ সাজিয়ে দিনরাতি	৬৮



# পত্রপুট



এক

জীবনে নানা সুখ দুঃখের  
এলোমেলো ভিড়ের মধ্যে  
হঠাৎ কখনো কাছে এসেছে  
সুসম্পূর্ণ সময়ের ছোটো একটু টুকরো ।  
গিরিপথের নানা পাথর-ছুড়ির মধ্যে  
যেন আচম্কা কুড়িয়ে-পাওয়া একটি হীরে  
কতবার ভেবেছি গেঁথে রাখব  
ভারতীর গলার হারে ;  
সাহস করিনি,  
ভয় হয়েছে কুলোবে না ভাষায় ।  
ভয় হয়েছে প্রকাশের ব্যগ্রতায়  
পাছে সহজের সীমা যায় ছাড়িয়ে ।

হিলেম দার্জিলিঙে,

সদর রাস্তার নিচে এক প্রচ্ছন্ন বাসায়।

সঙ্গীদের উৎসাহ হোলো

রাত কাটাবে সিঞ্চল পাহাড়ে।

ভরসা ছিল না সন্ন্যাসী গিরিরাজের নির্জন সভার 'পরে,—

কুলির পিঠের উপরে চাপিয়েছি নিজেদের সম্বল থেকেই

অবকাশ-সন্তোষের উপকরণ।

সঙ্গে ছিল একথানা এসরাজ, ছিল ভোজ্যের পেটিকা,

ছিল হো হা করবার অদম্য উৎসাহী যুবক,

টাটুর উপর চেপেছিল আনাড়ি নবগোপাল,

তাকে বিপদে ফেলবার জন্যে ছিল ছেলেদের কৌতুক।

সমস্ত আঁকাবাঁকা পথে

বেঁকে বেঁকে ধ্বনিত হোলো অট্টহাস্ত।

শৈলশৃঙ্গবাসের শূণ্যতা পূরণ করব ক'জনে মিলে,

সেই রস জোগান দেবার অধিকারী আমরাই

এমন ছিল আমাদের আত্মবিশ্বাস।

অবশেষে চড়াই-পথ যখন শেষ হোলো

তখন অপরাহ্নের হয়েছে অবসান।

ভেবেছিলেম আমোদ হবে প্রচুর,

অসংযত কোলাহল উচ্ছ্বসিত মন্দিরার মতো

রাত্রিকে দেবে ফেনিল ক'রে।

শিখরে গিয়ে পৌঁছলেম অব্যাহত আকাশে,

সূর্য নেমেছে অস্ত-দিগন্তে

নদীজালের রেখাঙ্কিত  
বহু দূর বিস্তীর্ণ উপত্যকায় ।  
পশ্চিমের দিগ্বলয়ে,  
সুর-বালকের খেলার অঙ্গনে  
স্বর্ণ-সুধার পাত্রখানা বিপর্যস্ত,  
পৃথিবী বিহ্বল তার প্রাবনে ।

প্রমোদমুখর সঙ্গীরা হোলো নিস্তব্ধ ।  
দাঁড়িয়ে রইলেম স্থির হয়ে ।  
এসরাজটা নিঃশব্দ পড়ে রইল মাটিতে,  
পৃথিবী যেমন উন্মুখ হয়ে আছে  
তার সকল কথা থামিয়ে দিয়ে ।  
মস্তুরচনার যুগে জন্ম হয়নি,  
মল্লিত হয়ে উঠল না মস্ত  
উদাস্তে অহুদাস্তে ।  
এমন সময় পিছন ফিরে দেখি  
সামনে পূর্ণচন্দ্র,  
বন্ধুর অকস্মাৎ হাস্যধ্বনির মতো ।  
যেন সুরলোকের সভাকবির  
সন্তোষবিচিত্র কাব্য-প্রহেলিকা  
রহস্যে রসময় ।

শুণী বীণায় আলাপ করে প্রতিদিন ।  
একদিন যখন কেউ কোথাও নেই  
এমন সময় সোনার তারে রূপোর তারে



হঠাৎ সুরে সুরে এমন একটা মিল হোলো  
 যা আর কোনোদিন হয়নি ।  
 সেদিন বেজে উঠল যে-রাগিণী  
 সেদিনের সঙ্গেই সে মগ্ন হোলো  
 অসীম নীরবে ।  
 গুণী বুঝি বীণা ফেললেন ভেঙে ।  
 অপূর্ব সুর যেদিন বেজেছিল  
 ঠিক সেইদিন আমি ছিলাম জগতে  
 বলতে পেরেছিলাম—  
 আশ্চর্য ।

শান্তিনিকেতন

৪ মে, ১৯৩৫

---

## দুই

শ্রীযুক্ত কালিদাস নাগ

কল্যাণীয়েষু

আমার ছুটি চারদিকে ধু ধু করছে  
ধান-কেটে-নেওয়া ক্ষেতের মতো ।  
আশ্বিনে সবাই গেছে বাড়ি ;  
তাদের সকলের ছুটির পলাতকা ধারা মিলেছে  
আমার একলা ছুটির বিস্তৃত মোহনায় এসে  
এই রাঙামাটির দীর্ঘ পথপ্রান্তে ।

আমার ছুটি ব্যাপ্ত হয়ে গেল  
দিগন্তপ্রসারী বিরহের জনহীনতায় ;  
তার তেপান্তর মাঠে কল্পলোকের রাজপুত্র  
ছুটিয়েছে পবন-বাহন ঘোড়া  
মরণ-সাগরের নীলিমায় ঘেরা  
স্মৃতিদ্বীপের পথে ।  
সেখানে রাজকন্যা চিরবিরহিণী  
ছায়াভবনের নিভৃত মন্দিরে ।  
এমনি ক'রে আমার ঠাইবদল হোলো  
এই লোক থেকে লোকাভীতে ॥

আমার মনের মধ্যে ছুটি নেমেছে  
যেন পদ্মার উপর শেষ শরতের প্রশান্তি ।

বাইরে তরঙ্গ গেছে থেমে  
 গতিবেগ রয়েছে ভিতরে ।  
 সান্ন হোলো ছুই তীর নিয়ে  
 ভাঙন-গড়নের উৎসাহ ।  
 ছোটো ছোটো আবর্ত চলেছে ঘুরে ঘুরে  
 আনমনা চিন্তাপ্রবাহে ভেসে-যাওয়া  
 অসংলগ্ন ভাবনা ।  
 সমস্ত আকাশের তারার ছায়াগুলিকে  
 আঁচলে ভরে নেবার অবকাশ তার বক্ষতলে  
 রাত্রে অঙ্ককারে ॥

মনে পড়ে অল্পবয়সের ছুটি ;  
 তখন হাওয়া-বদল ঘর থেকে ছাদে ;  
 লুকিয়ে আসত ছুটি, কাজের বেড়া ডিঙিয়ে,  
 নীল আকাশে বিছিয়ে দিত  
 বিরহের স্নিবিড় শূন্যতা,  
 শিরায় শিরায় মিড় দিত তীব্র টানে  
 না-পাওয়ার না-বোঝার বেদনায়,  
 এড়িয়ে যাওয়ার ব্যর্থতার সুরে ।  
 সেই বিরহগীতগুঞ্জরিত পথের মাঝখান দিয়ে  
 কখনো বা চমকে চলে গেছে  
 শ্রামলবরন মাধুরী  
 চকিত কটাক্ষের অব্যক্ত বাণী বিক্ষেপ ক'রে,  
 বসন্তবনের হরিণী যেমন দীর্ঘনিশ্বাসে ছুটে যায়  
 দিগন্তপারের নিকৃদ্দেশে ॥

এমনি ক'রে চিরদিন জেনে এসেছি

মোহনকে লুকিয়ে দেখার অবকাশ এই ছুটি

অকারণ বিরহের নিঃসীম নির্জনতায় ॥

হাওয়া-বদল চাই—

এই কথাটা আজ হঠাৎ হাঁপিয়ে উঠল

ঘরে ঘরে হাজার লোকের মনে ।

টাইম-টেবিলের গহনে গহনে

ওদের খোঁজ হোলো সারা,

সাজ হোলো গাঁঠনি-বাঁধা,

বিরল হোলো গাঁঠের কড়ি ।

এদিকে, উনপঞ্চাশ পবনের লাগাম ঝাঁর হাতে

ভিনি আকাশে আকাশে উঠেছেন হেসে

ওদের ব্যাপার দেখে ।

আমার নজরে পড়েছে সেই হাসি,

তাই চূপচাপ বসে আছি এই চাতালে

কেদারাটা টেনে নিয়ে ॥

দেখলেম বর্ষা গেল চ'লে

কালো ফরাসটা নিল গুটিয়ে ।

ভাদ্রশেষের নিরেট গুমটের উপরে

থেকে থেকে ধাকা লাগল

সংশয়িত উত্তরে হাওয়ার ।

সাঁওতাল ছেলেরা শেষ করেছে কেয়াকুল বেচা ;

মাঠের দূরে দূরে ছড়িয়ে পড়েছে গোরুর পাল,

আবেগ ভাঙের ডুরিভোজের অবসানে  
 তাদের ভাবখানা অতি মন্থর ;  
 কী জানি, মুখ-ডোবানো রসালো ঘাসেই তাদের তৃপ্তি  
 না, পিঠে কাঁচা রোজ লাগানো আলস্যে ।

হাওয়া-বদলের দায় আমার নয় ;  
 তার জন্তে আছেন স্বয়ং দিকপালেরা  
 রেলোয়ে স্টেশনের বাইরে,  
 তাঁরাই বিশ্বের ছুটিবিভাগে রসসৃষ্টির কারিগর ।  
 অস্ত আকাশে লাগল তাঁদের নতুন তুলির টান  
 অপূর্ব আলোকের বর্ণচ্ছটায় ।  
 প্রজাপতির দল নামালেন  
 রোজে ঝলমল ফুলভরা টগরের ডালে,  
 পাতায়-পাতায় যেন বাহবাধ্বনি উঠেছে  
 ওদের হাল্কা ডানার এলোমেলো তালের রঙিন নৃত্যে ।  
 আমার আঙিনার ধারে ধারে এতদিন চলেছিল  
 এক সার জুঁই বেলের ফোটা-ঝরার হৃন্দ,  
 সংকেত এল, তা'রা সরে পড়ল নেপথ্যে ;  
 শিউলি এল ব্যতিব্যস্ত হয়ে ;  
 এখনো বিদায় মিলল না মালতীর ।  
 কাশের বনে লুটিয়ে পড়েছে গুল্লাসপ্তমীর জ্যোৎস্না,—  
 পূজার পার্বণে তাঁদের নতুন উত্তরী  
 বর্ষাজলে ধোপ-দেওয়া ॥

আজ নি-খরচার হাওয়া-বদল জলেহলে ।

খরিদদারের দল তাকে এড়িয়ে চলে গেল

দোকানে বাজারে ।

বিধাতার দামী দান থাকে লুকোনো

বিনা দামের প্রশ্নয়ে,

শুলভ ঘোমটার নিচে থাকে

হুলভের পরিচয় ।

আজ এই নি-কড়িয়া ছুটির অজস্রতা

সরিয়েছেন তিনি ভিড়ের থেকে

জনকয়েক অপরাধেয় কুঁড়ে মানুষের প্রাঙ্গণে ।

তাদের জন্তেই পেতেছেন খাষদরবারের আসর

তার আম-দরবারের মাঝখানেই,—

কোনো সীমানা নেই আঁকা ।

এই ক'জনের দিকে তাকিয়ে

উৎসবের বীণকারকে তিনি বায়না দিয়ে এসেছেন

অসংখ্য যুগ থেকে ॥

বাঁশি বাজল ।

আমার ছুই চক্ষু যোগ দিল

কয়খানা হাল্কা মেঘের দলে ।

ওরা ভেসে পড়েছে নিঃশেষে মিলিয়ে যাবার খেয়ায় ।

আমার মন বেরোলো নিজনে আসন-পাতা

শাস্ত্র অভিসারে,

যা-কিছু আছে সমস্ত পেরিয়ে যাবার যাত্রায় ॥

আমার এই স্তব্ধ ভ্রমণ হবে সারা,  
 ছুটি হবে শেষ,  
 হাওয়া-বদলের দল ফিরে আসবে ভিড় ক'রে,  
 আসন্ন হবে বাকি-পড়া কাজের তাগিদ ।  
 ফুরোবে আমার ফির্তি-টিকিটের মেয়াদ,  
 ফিরতে হবে এইখান থেকেই এইখানেই,  
 মাঝখানে পার হব অসীম সমুদ্র ॥

গুরুসপ্তমৌ আশ্বিন

১৩৪২

---

## তিন

আজ আমার প্রগতি গ্রহণ করো, পৃথিবী,  
শেষ নমস্কারে অবনত দিনাবসানের বেদীতলে ।

মহাবীর্যবতী, তুমি বীরভোগ্যা,  
বিপরীত তুমি ললিতে কঠোরে,  
মিশ্রিত তোমার প্রকৃতি পুরুষে নারীতে ;  
মাহুষের জীবন দোলায়িত করো তুমি দুঃসহ স্বন্দে ।  
ডান হাতে পূর্ণ করো সুধা  
বাম হাতে চূর্ণ করো পাত্র,  
তোমার লীলাক্ষেত্র মুখরিত করো অটুবিদ্রোপে ;  
দুঃসাধ্য করো বীরের জীবনকে, মহৎজীবনে যার অধিকার ।  
শ্রেয়কে করো দুর্মূল্য,  
কৃপা করো না কৃপাপাত্রকে ।  
তোমার গাছে গাছে প্রচ্ছন্ন রেখেছ প্রতিমূহূর্তের সংগ্রাম,  
ফলে শস্ত্রে তার জয়মাল্য হয় সার্থক ।  
জলে স্থলে তোমার ক্ষমাহীন রণরঙ্গভূমি,  
সেখানে মৃত্যুর মুখে ঘোষিত হয় বিজয়ী প্রাণের জয়বার্তা ।  
তোমার নির্দয়তার ভিত্তিতে উঠেছে সভ্যতার জয়তোরণ,  
ক্রটি ঘটলে তার পূর্ণ মূল্য শোধ হয় বিনাশে ।  
তোমার ইতিহাসের আদিপর্বে দানবের প্রতাপ ছিল দুর্জয়,  
সে পরুষ, সে বর্বর, সে মূঢ় ।



তার অঙ্গুলি ছিল স্থূল, কলাকৌশলবর্জিত ;  
 গদা-হাতে মুঘল-হাতে লণ্ডভণ্ড করেছে সে সমুদ্র পর্বত ;  
 অগ্নিতে বাষ্পেতে ছঃস্বপ্ন ঘুলিয়ে তুলেছে আকাশে ।  
 জড় রাজত্বে সে ছিল একাধিপতি,  
 প্রাণের পরে ছিল তার অন্ধ ঈর্ষা ।

দেবতা এলেন পর-যুগে

মন্ত্র পড়লেন দানব-দমনের,  
 জড়ের ঔদ্ধত্য হোলো অভিভূত ;  
 জীবধাত্রী বসলেন শ্যামল আস্তরণ পেতে ।  
 উষা দাঁড়ালেন পূর্বাচলের শিখর-চূড়ায়,  
 পশ্চিম সাগরতীরে সন্ধ্যা নামলেন মাথায় নিয়ে শাস্তিঘট ।  
 নম্র হোলো শিকলে-বাঁধা দানব,  
 তবু সেই আদিম বর্বর আঁকড়ে রইল তোমার ইতিহাস ।  
 ব্যবস্থার মধ্যে সে হঠাৎ আনে বিশৃঙ্খলতা,  
 তোমার স্বভাবের কালো গর্ত থেকে  
 হঠাৎ বেরিয়ে আসে এঁকেবেঁকে ।  
 তোমার নাড়ীতে লেগে আছে তার পাগলামি ।  
 দেবতার মন্ত্র উঠছে আকাশে বাতাসে অরণ্যে  
 দিনেরাত্রে  
 উদাত্ত অল্পদাত্ত মন্ত্রস্বরে ।  
 তবু তোমার বক্ষের পাতাল থেকে আধপোষা নাগ-দানব  
 ক্ষণে ক্ষণে উঠছে ফণা তুলে',  
 তার ভাড়াণায় তোমার আপন জীবকে করছ আঘাত,  
 হারবার করছ আপন সৃষ্টিকে ।

শুভে অশুভে স্থাপিত তোমার পাদপীঠে,  
 তোমার প্রচণ্ড সুন্দর মহিমার উদ্দেশে  
 আজ রেখে যাব আমার কৃতচিহ্নাঙ্কিত জীবনের প্রণতি ।  
 বিরাট প্রাণের, বিরাটমৃত্যুর গুণসঞ্চার  
 তোমার যে-মাটির তলায়  
 তাকে আজ স্পর্শ করি, উপলব্ধি করি সর্ব দেহে মনে ।  
 অগণিত যুগযুগান্তরের  
 অসংখ্য মানুষ্যের লুপ্তদেহ পুঞ্জিত তার ধূলায় ।  
 আমিও রেখে যাব কয় মুষ্টি ধূলি  
 আমার সমস্ত সুখদুঃখের শেষ পরিণাম,  
 রেখে যাব এই নামগ্রাসী, আকারগ্রাসী সকল পরিচয়গ্রাসী  
 নিঃশব্দ মহাধূলিরাশির মধ্যে ।  
 অচল অবরোধে আবদ্ধ পৃথিবী, মেঘলোকে উধাও পৃথিবী,  
 গিরিশৃঙ্গমালার মহৎ মৌনে ধ্যানমগ্না পৃথিবী,  
 নীলানুরাশির অতলতরঙ্গে কলমস্ত্রমুখরা পৃথিবী,  
 অন্নপূর্ণা তুমি সুন্দরী, অন্নরিক্তা তুমি ভীষণা ।  
 একদিকে আপকথাত্তারনত্র তোমার শস্ত্রক্ষেত্র,  
 সেখানে প্রসন্ন প্রভাতসূর্য প্রতিদিন মুছে নেয় শিশিরবিন্দু  
 কিরণ-উত্তরীয় বুলিয়ে দিয়ে ।  
 অন্তগামী সূর্য শ্রামলশস্ত্রহিল্লোলে রেখে যায় অকণ্ঠিত এই বাণী—  
 “আমি আনন্দিত ।”  
 অশ্রুদিকে তোমার জলহীন ফলহীন আতঙ্কপাণ্ডুর মরুক্ষেত্রে  
 পরিকীরণ পশুকঙ্কালের মধ্যে মরীচিকার প্রেতনৃত্য ।  
 বৈশাখে দেখেছি বিদ্যুৎচকুবিদ্ধ দিগন্তকে ছিনিয়ে নিতে এল  
 কালো শ্রেন পাখির মতো তোমার ঝড়,  
 সমস্ত আকাশটা ডেকে উঠল যেন কেশর-কোলা সিংহ,

তার ল্যাজের কাপটে ডালপালা আলুখালু ক'রে  
 হতাশ বনস্পতি ধুলায় পড়ল উবুড় হয়ে ।  
 হাওয়ার মুখে ছুটল ভাঙা কুঁড়ের চাল  
 শিকলছেঁড়া কয়েদী-ডাকাভের মতো ।  
 আবার ফাস্তানে দেখেছি তোমার আতপ্ত দক্ষিণে হাওয়া  
 ছড়িয়ে দিয়েছে বিরহ মিলনের স্বগতপ্রলাপ  
 আত্মমুকুলের গন্ধে ।  
 চাঁদের পেয়ালা ছাপিয়ে দিয়ে উপচিয়ে পড়েছে  
 স্বর্গীয় মদের ফেনা ।  
 বনের মর্মরধ্বনি ঝঞ্জাবায়ুর স্পর্ধায় ধৈর্য হারিয়েছে  
 অকস্মাৎ কলোচ্ছ্বাসে ॥  
 স্নিগ্ধ তুমি, হিংস্র তুমি, পুরাতনী, তুমি নিত্যনবীনা,  
 অনাদি সৃষ্টির যজ্ঞ হুতাগ্নি থেকে বেরিয়ে এসেছিলে  
 সংখ্যাগণনার অতীত প্রত্যাষে,  
 তোমার চক্রতীর্থের পথে পথে ছড়িয়ে এসেছ  
 শত শত ভাঙা ইতিহাসের অর্থলুপ্ত অবশেষ—  
 বিনাবেদনায় বিছিয়ে এসেছ তোমার বর্জিত সৃষ্টি  
 অগণ্য বিস্মৃতির স্তরে স্তরে ।  
 জীবপালিনী, আমাদের পুষেছ  
 তোমার খণ্ডকালের ছোটো ছোটো পিঞ্জরে ।  
 তারই মধ্যে সব খেলার সীমা  
 সব কীর্তির অবসান ।  
 'আজ আমি কোনো মোহ নিয়ে আসিনি তোমার সম্মুখে,  
 এতদিন যে দিনরাত্রির মালা গোঁথেছি বসে বসে  
 তার জন্তে অমরতার দাবি করব না তোমার দ্বারে ।

তোমার অযুত নিযুত বৎসর সূর্য-প্রদক্ষিণের পথে  
 যে বিপুল নিমেষগুলি উন্মীলিত নিমীলিত হোতে থাকে  
 তারই এক ক্ষুদ্র অংশে কোনো একটি আসনের  
 সত্যমূল্য যদি দিয়ে থাকি,  
 জীবনের কোনো একটি ফলবান খণ্ডকে  
 যদি জয় ক'রে থাকি পরম হৃৎখে  
 তবে দিয়ো তোমার মাটির ফোঁটার একটি তিলক আমার কপালে ;  
 সে চিহ্ন যাবে মিলিয়ে  
 যে-রাত্রে সকল চিহ্ন পরম অচিনের মধ্যে যায় মিশে ॥

হে উদাসীন পৃথিবী,  
 আমাকে সম্পূর্ণ ভোলবার আগে  
 তোমার নিমর্ন্ত পদপ্রান্তে  
 আজ রেখে যাই আমার প্রণতি ॥

শান্তিনিকেতন  
 ১৬ অক্টোবর, ১৯৩৫

---

## চার

একদিন আঘাতে নামল

বাঁশবনের মর্মর-ঝরা ডালে

জলভারে অভিভূত নীলমেঘের নিবিড় ছায়া ।

গুরু হোলো ফসলক্ষেতের জীবনীরচনা

মাঠে মাঠে কচিধানের চিকন অঙ্কুরে ।

এমন সে প্রচুর, এমন পরিপূর্ণ, এমন প্রোৎফুল্ল,

হ্যালোকে ভুলোকে বাতাসে আলোকে

তার পরিচয় এমন উদার-প্রসারিত—

মনে হয় না সময়ের ছোটো বেড়ার মধ্যে তাকে কুলাতে পারে;

তার অপরিমেয় শ্রামলতায়

আছে যেন অসীমের চির-উৎসাহ,

যেমন আছে তরঙ্গ-উল্লোল সমুদ্রে ॥

মাস যায় ।

শ্রাবণের স্নেহ নামে আঘাতের ছল ক'রে,

সবুজ মঞ্জরী এগিয়ে চলে দিনে দিনে

শিখগুলি কাঁধে তুলে নিয়ে

অস্তহীন স্পর্ধিত জয়যাত্রায় ।

তার আত্মাভিমানী যৌবনের প্রগল্ভতার 'পরে

সূর্যের আলো বিস্তার করে হাস্তোজ্জ্বল কৌতুক,

নিশীথের তারা নিবিষ্ট করে নিস্তব্ধ বিশ্বয় ॥

মাস যায় ।

বাতাসে থেমে গেল মন্ততার আন্দোলন,  
শরতের শান্তনির্মল আকাশ থেকে  
অমল শব্দধ্বনিতে বাণী এল—  
প্রস্তুত হও ।  
সারা হোলো শিশির-জলে স্নানব্রত ॥

মাস যায় ।

নির্মম শীতের হাওয়া এসে পৌঁছল হিমাচল থেকে,  
সবুজের গায়ে গায়ে এঁকে দিল হলুদের ইশারা,  
পৃথিবীর দেওয়া রং বদল হোলো আলোর দেওয়া রঙে ।  
উড়ে এল হাঁসের পাঁতি নদীর চরে,  
কাশের গুচ্ছ বারে পড়ল তটের পথে পথে ॥

মাস যায় ।

বিকালবেলার রৌদ্রকে যেমন উজাড় করে দিনান্ত  
শেষ গোধূলির ধূসরতায়  
তেমনি সোনার ফসল চলে গেল  
অন্ধকারের অবরোধে ।  
তারপরে শূন্যমাঠে অতীতের চিহ্নগুলো  
কিছুদিন রইল মৃত শিকড় আঁকড়ে ধরে—  
শেষে কালো হয়ে ছাই হোলো আগুনের লেহনে ।

মাস গেল ।

তারপরে মাঠের পথ দিয়ে

গোরু নিয়ে চলে রাখাল,

কোনো ব্যথা নেই তাতে, কোনো ক্লতি নেই কারো ।

প্রান্তরে আপন ছায়ায় মগ্ন একলা অশ্বথ গাছ,

সূর্য-মন্ত্র-জপকরা ঋষির মতো ।

তারি তলায় ছপূর বেলায় ছেলেটা বাজায় বাঁশি

আদিকালের গ্রামের সুরে ।

সেই সুরে তান্রবরন তপ্ত আকাশে

বাতাস হুহু ক'রে ওঠে,

সে যে বিদায়ের নিত্য ভাঁটায় ভেসে-চলা

মহাকালের দীর্ঘনিঃশ্বাস,

যে কাল, যে পথিক, পিছনের পান্থশালাগুলির দিকে

আর ফেরার পথ পায় না

একদিনেরও জন্তে ॥

শান্তিনিকেতন

১২ অক্টোবর, ১৯৩৫

---

## পাঁচ

সন্ধ্যা এল চুল এলিয়ে

অস্ত-সমুদ্রে সত্তা স্নান ক'রে ।

মনে হোলো, স্বপ্নের ধূপ উঠছে

নক্ষত্রলোকের দিকে ।

মায়াবিষ্ট নিবিড় সেই স্তব্ধ ক্ষণে—

—তার নাম করব না—

সবে সে চুল বেঁধেছে, পরেছে আসমানি রঙের শাড়ি,

খোলা ছাদে গান গাইছে একা ।

আমি দাঁড়িয়ে ছিলাম পিছনে

ও হয়তো জানে না, কিংবা হয়তো জানে ॥

ওর গানে বলছে সিদ্ধ কাফির সুরে—

—চলে যাবি এই যদি তোর মনে থাকে

ডাকব না ফিরে ডাকব না,

ডাকি নে তো সকালবেলার শুকতারাকে ।—

শুনতে শুনতে স'রে গেল সংসারের ব্যাবহারিক আচ্ছাদনটা,

যেন কুঁড়ি থেকে পূর্ণ হয়ে ফুটে বেরোল

অগোচরের অপরূপ প্রকাশ ;

তার লঘু গন্ধ ছড়িয়ে পড়ল আকাশে ;

অপ্রাপণীয়ের সে দীর্ঘনিঃশ্বাস,

হ্রস্ব হ্রাশার সে অজুকারিত ভাষা ।



একদা মৃত্যুশোকের বেদমন্ত্র

তুলে ধরেছে বিশ্বের আবরণ, বলেছে—

পৃথিবীর ধূলি মধুময় ।

সেই সুরে আমার মন বললে,—

সংগীতময় ধরার ধূলি ।

আমার মন বললে,—

মৃত্যু, ওগো মধুময় মৃত্যু,

তুমি আমায় নিয়ে চলেছ লোকান্তরে

গানের পাখায় ॥

আমি ওকে দেখলেম—

যেন নিকষবরন ঘাটে সন্ধ্যার কালো জলে

অরুণবরন পা-ছুখানি ডুবিয়ে বসে আছে অঙ্গরী,

অকূল সরোবরে সুরের ঢেউ উঠেছে মৃহ্মৃহ,

আমার বৃকের কাঁপনে কাঁপন-লাগা হাওয়া

ওকে স্পর্শ করেছে ঘিরে ঘিরে ॥

আমি ওকে দেখলেম,

যেন আলো-নেবা বাসরঘরে নববধু,

আসন্ন প্রত্যাশার নিবিড়তায়

দেহের সমস্ত শিরা স্পন্দিত ।

আকাশে ফ্রবতারার অনিমেঘ দৃষ্টি,

বাতাসে সাহানা রাগিণীর করুণা ॥

আমি ওকে দেখলেম

ও যেন ফিরে গিয়েছে পূর্বজন্মে

চেনা অচেনার অস্পষ্টতায় ।

সে যুগের পালানো বাণী ধরবে ব'লে

ঘুরিয়ে ফেলছে গানের জাল,

স্বরের ছোঁয়া দিয়ে খুঁজে খুঁজে ফিরছে

হারানো পরিচয়কে ॥

সমুখে ছাদ ছাড়িয়ে উঠেছে বাদাম গাছের মাথা,

উপরে উঠল কৃষ্ণচতুর্থীর চাঁদ ।

ডাকলেম নাম ধ'রে ।

তীক্ষ্ণ বেগে উঠে দাঁড়াল সে,

ক্রকুটি ক'রে বললে, আমার দিকে ফিরে,—

“এ কী অন্ডায়

কেন এলে লুকিয়ে ।”

কোনো উত্তর করলেম না ।

বললেম না, প্রয়োজন ছিল না এই তুচ্ছ ছলনার

বললেম না, আজ সহজে বলতে পারতে, এসো,

বলতে পারতে,—খুশি হয়েছি ।

মধুময়ের উপর পড়ল ধুলার আবরণ ॥

পরদিন ছিল হাটবার ।

জানলায় ব'সে দেখছি চেয়ে ।

রৌজ ধু ধু করছে পাশের সেই খোলা ছাদে

তার স্পষ্ট আলোয় বিগত বসন্ত রাত্রে বিহ্বলতা

সে দিয়েছে ঘুচিয়ে।

নির্বিশেষে ছড়িয়ে পড়ল আলো মাঠেবাটে,

মহাজনের টিনের ছাদে,

শাকসব্জীর বুড়ি চুপড়িতে,

আঁটিবাঁধা খড়ে,

হাঁড়ি মালসার স্তূপে,

নতুন গুড়ের কলসীর গায়ে।

সোনার কাঠি ছুঁইয়ে দিল

মহানীম গাছের ফুলের মঞ্জরীতে ॥

পথের ধারে তালের গুঁড়ি আঁকড়ে উঠেছে অশথ,

অন্ধ বৈরাগী তারি ছায়ায় গান গাইছে হাঁড়ি বাজিয়ে—

—কাল আসব ব'লে চলে গেল

আমি যে সেই কালের দিকে তাকিয়ে আছি।—

কেনাবেচার বিচিত্র গোলমালের জমিনে

ঐ সুরের শিল্পে বুনে উঠছে

যেন সমস্ত বিশ্বের একটা উৎকর্ষার মন্ত্র—

“তাকিয়ে আছি।”

একজোড়া মোষ উদাস চোখ মেলে

বয়ে চলেছে বোঝাই গাড়ি,

গলায় বাজছে ঘণ্টা,

চাকার পাকে পাকে টেনে তুলছে কাতর ধ্বনি।

আকাশের আলোয় আজ যেন মেঠো বাঁশির সুর মেলে-দেওয়া।

সব জড়িয়ে মন ফুলেছে।

বেদমন্ত্রের ছন্দে

আবার মন বললে—

মধুময় এই পার্থিব ধূলি।

কেরোসিনের দোকানের সামনে

চোখে পড়ল একজন এ-কেলে বাউল ।

তালিদেওয়া আলখান্নার উপরে

কোমরে-বাঁধা একটা বাঁয়া ।

লোক জমেছে চারিদিকে ।

হাসলেম, দেখলেম অসুতেরও সংগতি আছে এইখানে,

এ-ও এসেছে হাটের ছবি ভর্তি করতে ।

ওকে ডেকে নিলেম জানলার কাছে,

ও গাইতে লাগল—

হাট করতে এলেম আমি অধরার সন্ধানে,

সবাই ধরে টানে আমায়, এই যে গো এইখানে ॥

শান্তিনিকেতন

২৫ অক্টোবর, ১৯৩৫



## ছয়

অতিথিবৎসল,

ডেকে নাও পথের পথিককে  
 তোমার আপন ঘরে,  
 দাও ওর ভয় ভাঙিয়ে ।  
 ও থাকে প্রদোষের বস্তিতে,  
 নিজের কালো ছায়া ওর সঙ্গে চলে  
 কখনো সমুখে কখনো পিছনে,  
 তাকেই সত্য ভেবে ওর যত দুঃখ যত ভয় ।  
 দ্বারে দাঁড়িয়ে তোমার আলো তুলে ধরো,  
 ছায়া যাক মিলিয়ে  
 থেমে যাক ওর বুকের কাঁপন ॥

বছরে বছরে ও গেছে চলে

তোমার আঙিনার সামনে দিয়ে,  
 সাহস পায়নি ভিতরে যেতে,  
 ভয় হয়েছে পাছে ওর বাইরের ধন  
 হারায় সেখানে ।  
 দেখিয়ে দাও ওর আপন বিশ্ব  
 তোমার মন্দিরে,  
 সেখানে মুছে গেছে কাছের পরিচয়ের কালিমা,  
 ঘুছে গেছে নিত্যব্যবহারের জীর্ণতা,  
 তার চিরলাবণ্য হয়েছে পরিস্ফুট ॥

পান্থশালায় ছিল ওর বাসা,  
 বৃকে আঁকড়ে ছিল তারই আসন, তারই শয্যা,  
 পলে পলে যার ভাড়া জুগিয়ে দিন কাটাল  
 কোন্ মুহূর্তে তাকে ছাড়বে ভয়ে  
 আড়াল তুলেছে উপকরণের ।  
 একবার ঘরের অভয় স্বাদ পেতে দাও তাকে  
 বেড়ার বাইরে ॥

আপনাকে চেনার সময় পায়নি সে,  
 ঢাকা ছিল মোটা মাটির পর্দায় ;  
 পর্দা খুলে দেখিয়ে দাও যে, সে আলো, সে আনন্দ,  
 তোমারি সঙ্গে তার রূপের মিল ।  
 তোমার যজ্ঞের হোমাগ্নিতে  
 তার জীবনের সুখদুঃখ আছতি দাও,  
 জ্বলে উঠুক তেজের শিখায়,  
 ছাই হোক যা ছাই হবার ।

হে অতিথিবৎসল,  
 পথের মানুষকে ডেকে নাও ঘরে,  
 আপনি যে ছিল আপনার পর হয়ে  
 সে পাক আপনাকে ॥

## সাত

চোখ ঘুমে ভেরে আসে,  
 মাঝে মাঝে উঠছি জেগে ।  
 যেমন নববর্ষার প্রথম পসলা বৃষ্টির জল  
 মাটি চুঁইয়ে পৌঁছয় গাছের শিকড়ে এসে  
 তেমনি তরুণ হেমন্তের আলো ঘুমের ভিতর দিয়ে  
 লেগেছে আমার অচেতন প্রাণের মূলে ।  
 বেলা এগোল তিনপ্রহরের কাছে ।  
 পাতলা সাদা মেঘের টুকরো  
 স্থির হয়ে ভাসছে কার্তিকের রোদদুরে—  
 দেবশিশুদের কাগজের নৌকো ।  
 পশ্চিম থেকে হাওয়া দিয়েছে বেগে,  
 দোলাহুলি লেগেছে তেঁতুলগাছের ডালে ।  
 উত্তরে গোয়ালপাড়ার রাস্তা,  
 গোরুর গাড়ি বিছিয়ে দিল গেরুয়া ধূলো  
 ফিকে নীল আকাশে ।  
 মধ্যদিনের নিঃশব্দ প্রহরে  
 অকাজে ভেসে যায় আমার মন  
 ভাবনাহীন দিনের ভেলায় ।  
 সংসারের ঘাটের থেকে রসি-ছেঁড়া এই দিন  
 বাঁধা নেই কোনো প্রয়োজনে ।

রঙের নদী পেরিয়ে সন্ধ্যাবেলায় অদৃশ্য হবে  
নিস্তরঙ্গ ঘুমের কালো সমুদ্রে ।

ফিকে কালিতে এই দিনটার চিহ্ন পড়ল কালের পাতায়,  
দেখতে দেখতে যাবে সে মিলিয়ে ।  
ঘন অন্ধরে যে সব দিন আঁকা পড়ে  
মাহুষের ভাগ্যলিপিতে,  
তার মাঝখানে এ রইল কাঁকা ।  
গাছের শুকনো পাতা মাটিতে ঝরে—  
সেও শোধ ক'রে যায় মাটির দেনা,  
আমার এই অলস দিনের ঝরা পাতা  
লোকারণ্যকে কিছুই দেয়নি ফিরিয়ে ।

তবু মন বলে

গ্রহণ করাও ফিরিয়ে দেওয়ার রূপান্তর ।  
সৃষ্টির ঝরনা বেয়ে যে-রস নামছে আকাশে আকাশে  
তাকে মেনে নিয়েছি আমার দেহে মনে ।  
সেই রঙিন ধারায় আমার জীবনে রং লেগেছে  
যেমন লেগেছে ধানের ক্ষেতে,  
যেমন লেগেছে বনের পাতায়,  
যেমন লেগেছে শরতে ঝিবাগী মেঘের উত্তরীয়ে ।  
এরা সবাই মিলে পূর্ণ করেছে আজকে দিনের বিশ্বছবি ।



আমার মনের মধ্যে চিকিয়ে উঠল আলোর ঝলক,  
 হেমন্তের আতপ্ত নিঃশ্বাস শিহর লাগাল  
 ঘুম-জাগরণের গঙ্গা-যমুনায়—  
 এও কি মেলে নি এই নিখিল ছবির পটে ।  
 জল স্থল আকাশের রসসত্ত্বে  
 অশথের চঞ্চল পাতার সঙ্গে  
 ঝলমল করছে আমার যে অকারণ খুশি  
 বিশ্বের ইতিবৃত্তের মধ্যে রইল না তার রেখা,  
 তবু বিশ্বের প্রকাশের মধ্যে রইল তার শিল্প ।  
 এই রসনিমগ্ন মুহূর্তগুলি  
 আমার হৃদয়ের রক্তপদ্মের বীজ,  
 এই নিয়ে ঋতুর দরবারে গাঁথা চলেছে একটি মালা ।  
 আমার চিরজীবনের খুশির মালা ।  
 আজ অকর্মণ্যের এই অখ্যাত দিন  
 ফাঁক রাখেনি ঐ মালাটিতে,—  
 আজও একটি বীজ পড়েছে গাঁথা ॥

কাল রাত্রি একা কেটেছে এই জানালার ধারে ।  
 বনের ললাটে লগ্ন ছিল শুক্লপঙ্কমীর চাঁদের রেখা ।  
 এও সেই একই জগৎ,  
 কিন্তু গুলী তার রাগিনী দিলেন বদল ক'রে  
 ঝাপসা আলোর মুহূর্তনায় ।

রাস্তায়-চলা ব্যস্ত যে পৃথিবী  
 এখন আঙিনায় আঁচল-মেলা তার স্তব্ধ রূপ ।  
 লক্ষ্য নেই কাছের সংসারে,  
 শুনছে তারার আলোয় গুঞ্জরিত পুরাণ কথা ।  
 মনে পড়ছে দূর বাষ্পযুগের শৈশবস্মৃতি ।  
 গাছগুলো স্তম্ভিত,  
 রাত্রির নিঃশব্দতা পুঞ্জিত যেন দেহ নিয়ে ।  
 ঘাসের অস্পষ্ট সবুজে সারি সারি পড়েছে ছায়া ।  
 দিনের বেলায় জীবনযাত্রার পথের ধারে  
 সেই ছায়াগুলি ছিল সেবাসহচরী ;  
 তখন রাখালকে দিয়েছে আশ্রয়,  
 মধ্যাহ্নের তীব্রতায় দিয়েছে শান্তি ।  
 এখন তাদের কোনো দায় নেই জ্যোৎস্নারাতে ;  
 রাত্রের আলোর গায়ে গায়ে বসেছে ওরা,  
 ভাইবোনে মিলে বুলিয়েছে তুলি  
 খামখেয়ালী রচনার কাজে ।  
 আমার দিনের বেলাকার মন  
 আপন সেতারের পদ'ী দিয়েছে বদল ক'রে ।  
 যেন চলে গেলেম পৃথিবীর কোনো প্রতিবেশী গৃহে,  
 তাকে দেখা যায় ছুরবীনে ।  
 যে গভীর অমুভূতিতে নিবিড় হোলো চিন্ত  
 সমস্ত সৃষ্টির অন্তরে তাকে দিয়েছি বিস্তীর্ণ ক'রে ।  
 ঐ চাঁদ ঐ তারা ঐ তমঃপুঞ্জগাছগুলি  
 এক হোলো, বিরাট হোলো, সম্পূর্ণ হোলো  
 আমার চেতনায় ।

বিশ্ব আমাকে পেয়েছে,

আমার মধ্যে পেয়েছে আপনাকে,

অলস কবির এই সার্থকতা ॥

শান্তিনিকেতন,

কার্তিক, শুক্লাষষ্ঠী

১৩৪২

---

## আট

আমাকে এনে দিল এই বুনো চারাগাছটি ।

পাতার রং হলদে সবুজ,  
ফুলগুলি যেন আলো পান করবার  
শিল্প-করা পেয়ালা, বেগুনি রঙের ।

প্রশ্ন করি, নাম কী,  
জবাব নেই কোনোখানে ।

ও আছে বিশ্বের অসীম অপরিচিতের মহলে  
যেখানে আছে আকাশের নামহারা তারা ।  
আমি ওকে ধ'রে এনেছি একটি ডাক-নামে  
আমার একলা জানার নিভূতে ।

ওর নাম পেয়ালী ।

বাগানের নিমন্ত্রণে এসেছে ডালিয়া, এসেছে ফুশিয়া,  
এসেছে ম্যারিগোল্ড,

ও আছে অনাদরের অচিহ্নিত স্বাধীনতায়,  
জাতে বাঁধা পড়েনি ;  
ও বাউল, ও অসামাজিক ।

দেখতে দেখতে ঐ খসে পড়ল ফুল ।

যে শব্দটুকু হোলো বাতাসে  
কানে এল না ।

ওর কুষ্টির রাশিচক্র যে নিমেষগুলির সমবায়ে  
 অণুপরিমাণ তার অঙ্ক,  
 ওর বৃকের গভীরে যে মধু আছে  
 কণাপরিমাণ তার বিন্দু ।

একটুকু কালের মধ্যে সম্পূর্ণ ওর যাত্রা,  
 একটি কল্পে যেমন সম্পূর্ণ  
 আগুনের পাপড়ি-মেলা সূর্যের বিকাশ ।  
 ওর ইতিহাসটুকু অতি ছোটো পাতার কোণে  
 বিশ্ব-লিপিকারের অতি ছোটো কলমে লেখা ।

তবু তারই সঙ্গে সঙ্গে উদ্ঘাটিত হচ্ছে বৃহৎ ইতিহাস ।  
 দৃষ্টি চলে না এক পৃষ্ঠা থেকে অন্য পৃষ্ঠায় ।  
 শতাব্দীর যে নিরন্তর স্রোত বয়ে চলেছে  
 বিলম্বিত তালের তরঙ্গের মতো,  
 যে ধারায় উঠল নামল কত শৈলশ্রেণী,  
 সাগরে মরুতে কত হোলো বেশ পরিবর্তন,  
 সেই নিরবধি কালেরই দীর্ঘ প্রবাহে এগিয়ে এসেছে  
 এই ছোটো ফুলটির আদিম সংকল্প  
 সৃষ্টির ঘাতপ্রতিঘাতে ।

লক্ষ লক্ষ বৎসর এই ফুলের ফোটা-ঝরার পথে  
 সেই পুরাতন সংকল্প রয়েছে নূতন, রয়েছে সজীব সচল,  
 ওর শেষ সমাপ্ত ছবি আজও দেয়নি দেখা ।

এই দেহহীন সংকল্প, সেই রেখাহীন ছবি  
 নিত্য হয়ে আছে কোন্ অদৃশ্যের ধ্যানে ।  
 যে অদৃশ্যের অন্তহীন কল্পনায় আমি আছি,  
 যে অদৃশ্যে বিধ্বত সকল মানুষের ইতিহাস  
 অতীতে ভবিষ্যতে ॥

শান্তিনিকেতন

৫ নভেম্বর, ১৯৩৫

---

## নয়

হেঁকে উঠল ঝড়,  
 লাগাল প্রচণ্ড তাড়া,  
 সূর্যাস্ত-সীমার রঙিন পাঁচিল ডিঙিয়ে  
 ব্যস্ত বেগে বেরিয়ে পড়ল মেঘের ভিড়,  
 বুঝি ইন্দ্রলোকের আগুন-লাগা হাতিশালা থেকে  
 গাঁ গাঁ শব্দে ছুটছে ঐরাবতের কালো কালো শাবক  
 শুঁড় আছড়িয়ে ।  
 মেঘের গায়ে গায়ে দগ্‌দগ্‌ করছে লাল আলো,  
 তার ছিন্ন স্বকের রক্তরেখা ।  
 বিহ্বল লাফ মারছে মেঘের থেকে মেঘে,  
 চালাচ্ছে ঝক্‌ঝকে খাঁড়া ;  
 বজ্রশব্দে গর্জে উঠছে দিগন্ত ;  
 উত্তর-পশ্চিমের আমবাগানে শোনা গেল হাঁফ-ধরা  
 একটা আওয়াজ,  
 এসে পড়ল পাটকিলে রঙের অন্ধকার,  
 শুকনো ধুলোর দম-আটকানো তুফান ।  
 ছুঁড়ে মারে টুকরো ডাল শুকনো পাতা,  
 চোখে মুখে ছিটোতে থাকে কাঁকরগুলো ;  
 আকাশটা ভূতে-পাওয়া ।

পথিক উপুড় হয়ে শুয়ে পড়েছে মাটিতে,  
ঘন আঁধার ভিতর থেকে উঠেছে ঘরহারা গোরুর উত্তরোল ডাক,  
দূরে নদীর ঘাটে হৈ হৈ রব ।

বোঝা গেল না কোন্‌দিকে ছড়মুড় ছড়দাড় ক'রে  
কিসের ওটা ভাঙ চুর ।

হরহর করে বুক,

কী হোলো, কী হোলো ভাবনা ।

কাকগুলো পড়ছে মুখ খুবড়িয়ে মাটিতে,

ঠোঁট দিয়ে ঘাস ধরছে কামড়িয়ে,

ধাক্কা খেয়ে যাচ্ছে সরে সরে,

ঝটপট করছে পাখা ছটো ।

নদীপথে ঝড়ের মুখে বাঁশঝাড়ের লুটোপুটি,

ডালগুলো ডাইনে বাঁয়ে আছাড় খায়,

দোহাই পাড়ে মরিয়া হয়ে ।

ভীকু হাওয়া সাঁই সাঁই শান দিচ্ছে আর চালাচ্ছে ছুরি

অন্ধকারের পাঁজরের ভিতর দিয়ে ।

জলে স্থলে শূন্যে উঠেছে

ঘুরপাক-খাওয়া আতঙ্ক ।

হঠাৎ সোঁদা গন্ধের দীর্ঘনিশ্বাস উঠল মাটি থেকে,

মুহূর্তে এসে পড়ল বৃষ্টি প্রবল ঝাপটায়,

হাওয়ার চোটে গুঁড়োনো জলের কঁটা,

পাতলা পদায়ে ঢেকে ফেললে সমস্ত বন,

আড়াল করলে মন্দিরের চূড়া,

কাঁসর ঘন্টার ঢং ঢং শব্দের দিল মুখচাপা ।

রাত তিন পহরে থেমে গেল ঝড়বৃষ্টি,

কালী হয়ে এল অন্ধকার নিকব পাথরের মতো ;



কেবলি চল্লি ব্যাঙের ডাক,  
 ঝাঁ ঝাঁ পোকায় শব্দ,  
 জোনাকির মিটিমিটি আলো,  
 আর যেন স্বপ্নে অঁংকে-ওঠা দম্কা হাওয়ায়  
 থেকে থেকে জলঝরা ঝাউয়ের ঝরঝরানি ।

শান্তিনিকেতন

চৈত্র, ১৩৪০

---

## দশ

এই দেহখানা বহন ক'রে আসছে দীর্ঘকাল  
 বহু ক্ষুদ্র মুহূর্তের রাগ ছেঁষ ভয় ভাবনা,  
 কামনার আবর্জনারাশি ।  
 এর আবির্ভাবের বারে বারে ঢাকা পড়ে  
 আত্মার মুক্ত রূপ ।  
 এ সত্যের মুখোষ প'রে সত্যকে আড়ালে রাখে ;  
 মৃত্যুর কাদামাটিতেই গড়ে আপনার পুতুল,  
 তবু তার মধ্যে মৃত্যুর আভাস পেলোই  
 নালিশ করে আত্মকণ্ঠে ।  
 খেলা করে নিজেকে ভোলাতে,  
 কেবলি ভুলতে চায় যে সেটা খেলা ।  
 প্রাণপণ সঞ্চয়ে রচনা করে মরণের অর্ঘ্য ;  
 স্মৃতিনিন্দার বাষ্পবুধুদে ফেনিল হয়ে  
 পাক খায় ওর হাসিকান্নার আবর্ত ।  
 বন্ধ ভেদ ক'রে ও হাউয়ের আগুন দেয় ছুটিয়ে,  
 শূন্যের কাছ থেকে ফিরে পায় ছাই,—  
 দিনে দিনে তাই করে জুপাকার ।  
 প্রতিদিন যে প্রভাতে পৃথিবী  
 প্রথম সৃষ্টির অক্লান্ত নির্মল দেববেশে দেয় দেখা,  
 আমি তার উদ্দীলিত আলোকের অনুসরণ ক'রে  
 অন্বেষণ করি আপন অন্তরলোক ।

অসংখ্য দণ্ড পল নিমেষের জটিল মলিন জালে বিজড়িত  
 দেহটাকে সরিয়ে ফেলি মনের থেকে,—  
 যেখানে স'রে যায় অঙ্ককার রাতের  
 নানা ব্যর্থ ভাবনার অত্যাঙ্কি,  
 যায় বিস্মৃত দিনের অনবধানে পুঞ্জিত লেখন যত,—  
 সেই সব নিমজ্জন-লিপি নীরব যার আত্মান,  
 নিঃশেষিত যার প্রত্যাশার ।

তখন মনে পড়ে, সবিতা,

তোমার কাছে ঋষি-কবির প্রার্থনা মন্ত্র,—  
 যে মন্ত্রে বলেছিলেন,—হে পুষণ,  
 তোমার হিরণ্য পাণ্ডে সত্যের মুখ আচ্ছন্ন,  
 উন্মুক্ত করো সেই আবরণ ।

আমিও প্রতিদিন উদয়দিবসলয় থেকে বিচ্ছুরিত রশ্মিচ্ছটায়  
 প্রসারিত ক'রে দিই আমার জাগরণ,  
 বলি,—হে সবিতা,

সরিয়ে দাও আমার এই দেহ, এই আচ্ছাদন,—  
 তোমার তেজোময় অঙ্গের সূক্ষ্ম অগ্নিকণায়  
 রচিত যে-আমার দেহের অণু পরমাণু,  
 তারো অলক্ষ্য অন্তরে আছে তোমার কল্যাণভম রূপ,  
 তাই প্রকাশিত হোক আমার নিরাবিল দৃষ্টিতে  
 আমার অন্তরতম সত্য

আদি যুগে অব্যক্ত পৃথিবীর সঙ্গে  
 তোমার বিরাজে ছিল বিলীন  
 সেই সত্য তোমারি ।

তোমার জ্যোতির স্তিমিত কেন্দ্রে মানুষ  
 আপনার মহৎস্বরূপকে দেখেছে কালে কালে,

কখনো নীল মহানদীর তীরে,  
কখনো পারস্যসাগরের কূলে,  
কখনো হিমাদ্রি-গিরিতটে,—  
বলেছে, জেনেছি আমরা অমৃতের পুত্র,  
বলেছে, দেখেছি অন্ধকারের পার হতে  
আদিত্যবর্ণ মহান পুরুষের আবির্ভাব ।

শান্তিনিকেতন

৭ নবেম্বর, ১৯৩৫

---

## এগারো।

কাস্তনের রঙিন আবেশ

যেমন দিনে দিনে মিলিয়ে দেয় বনভূমি

নীরস বৈশাখের রিক্ততায়,

তেমনি ক'রেই সরিয়ে ফেলেছ হে প্রমদা, তোমার মদির মায়া

অনাদরে অবহেলায় ।

একদিন আপন হাতে আমার চোখে বিছিয়েছিলে বিহ্বলতা,

রক্তে দিয়েছিলে দোল,

চিন্ত ভরেছিলে নেশায়, হে আমার সাকী,

পাত্র উজাড় ক'রে

জাহুরসধারা আজ ঢেলে দিয়েছ ধুলায় ।

আজ উপেক্ষা করেছ আমার স্মৃতিকে,

আমার ছুই চক্ষুর বিস্ময়কে ডাক দিতে ভুলে গেলে ;

আজ তোমার সাজের মধ্যে কোনো আকৃতি নেই ।

নেই সেই নীরব সুরের ঝংকার

যা আমার নামকে দিয়েছিল রাগিনী ।

গুনেছি একদিন তাঁদের দেহ ঘিরে

ছিল হাওয়ার আবর্ত ।

তখন ছিল তা'র রঙের শিল্প,

ছিল সুরের মন্ত্র,

ছিল সে নিত্য নবীন ।

দিনে দিনে উদাসী কেন ঘুটিয়ে দিল

আপন লীলার প্রবাহ ।

কেন ক্লান্ত হোলো সে আপনার মাধুর্যকে নিয়ে ।

আজ শুধু তার মধ্যে আছে

আলোছায়ার মৈত্রীবিহীন স্বন্দ,—

ফোটে না ফুল,

বহে না কলমুখরা নির্ঝরিনী ।

সেই বাণীহারা চাঁদ তুমি আজ আমার কাছে ।

হুঃখ এই যে, এতে হুঃখ নেই তোমার মনে ।

একদিন নিজেকে নূতন নূতন ক'রে সৃষ্টি করেছিলে মায়াবিনী,

আমারি ভালোলাগার রঙে রঙিয়ে ।

আজ তারি উপর তুমি টেনে দিলে

যুগান্তের কালো যবনিকা

বর্ণহীন, ভাষাবিহীন ।

ভুলে গেছ, যতই দিতে এসেছিলে আপনাকে

ততই পেয়েছিলে আপনাকে বিচিত্র ক'রে ।

আজ আমাকে বঞ্চিত ক'রে

বঞ্চিত হয়েছ আপন সার্থকতায় ।

তোমার মাধুর্যযুগের ভগ্নশেষ

রইল আমার মনের স্তরে স্তরে ।

সেদিনকার তোরণের স্তূপ,

প্রাসাদের ভিত্তি,

গুল্মে ঢাকা বাগানের পথ ।

আমি বাস করি

তোমার ভাঙা ঐশ্বর্যের ছড়ানো টুকরোর মধ্যে ।

আমি খুঁজে বেড়াই মাটির তলার অন্ধকার,  
কুড়িয়ে রাখি যা ঠেকে হাতে। •

আর তুমি আছ

আপন কৃপণতার পাণ্ডুর মরুদেশে,  
পিপাসিতের জন্তে জল নেই সেখানে,  
পিপাসাকে ছলনা করতে পারে  
নেই এমন মরীচিকারও সম্বল ॥

শান্তিনিকেতন

১৬ ফেব্রুয়ারি, ১৯৩৬

---

## বারো।

বসেছি অপরাহ্নে পারের খেয়াঘাটে

শেষ ধাপের কাছটাতে ।

কালো জল নিঃশব্দে বয়ে যাচ্ছে পা ডুবিয়ে দিয়ে ।

জীবনের পরিত্যক্ত ভোজের ক্ষেত্র প'ড়ে আছে পিছন দিকে

অনেক দিনের ছড়ানো উচ্ছিষ্ট নিয়ে ।

মনে পড়ছে ভোগের আয়োজনে

কাঁক পড়েছে বারংবার ।

কতদিন যখন মূল্য ছিল হাতে

হাট জমেনি তখনো,

বোঝাই নৌকো লাগল যখন ডাঙায়

তখন ঘণ্টা গিয়েছে বেজে,

ফুরিয়েছে বেচাকেনার প্রহর ।

অকাল বসন্তে জেগেছিল ভোরের কোকিল ;

সেদিন তার চড়িয়েছি সেভারে,

গানে বসিয়েছি সুর ।

যাকে শোনাব তার চুল যখন হোলো বাঁধা,

বুকে উঠল জাক্রানি রঙের আঁচল

তখন ঝিকিমিকি বেলা,

করুণ ক্লান্তি লেগেছে মূলতানে ।

ক্রমে ধূসর আলোর উপরে কালো মরচে পড়ে এল ।



থেমে-যাওয়া গানখানি নিভে-যাওয়া প্রদীপের ভেলার মতো  
 ডুবল বুঝি কোন্ একজনের মনের তলায়,  
 উঠল বুঝি তার দীর্ঘনিশ্বাস,  
 কিন্তু জ্বালানো হোলো না আলো ॥

এ নিয়ে আজ নালিশ নেই আমার ।  
 বিরহের কালো গুহা ক্ষুধিত গহ্বর থেকে  
 ঢেলে দিয়েছে ক্ষুভিত সুরের ঝরনা রাত্রিদিন ।  
 সাত রঙের ছটা খেলেছে তার নাচের উড়নিতে  
 সারাদিনের সূর্যালোকে,  
 নিশীথরাত্রের জপমন্ত্র ছন্দ পেয়েছে  
 তার তিমিরপুঞ্জ কলোচ্ছল ধারায় ।  
 আমার তপ্ত মধ্যাহ্নের শূন্যতা থেকে উচ্ছ্বসিত  
 গোড়-সারঙের আলাপ ।  
 আজ বঞ্চিত জীবনকে বলি সার্থক,  
 নিঃশেষ হয়ে এল তার হৃৎকের সঞ্চয়  
 মৃত্যুর অর্ঘ্যপাত্রে,  
 তার দক্ষিণা রয়ে গেল কালের বেদীপ্রান্তে ।

জীবনের পথে মানুষ যাত্রা করে  
 নিজেকে খুঁজে পাবার জন্তে ।  
 গান যে-মানুষ গায়, দিয়েছে সে ধরা, আমার অন্তরে ;  
 যে মানুষ দেয় প্রাণ, দেখা মেলেনি তার ।  
 দেখেছি শুধু আপনার নিভৃত রূপ  
 ছায়ায় পরিকীর্ণ,  
 যেন পাহাড়তলীতে একখানা অনুত্তরঙ্গ সরোবর ।

ভীরের গাছ থেকে

সেখানে বসন্ত-শেষের ফুল পড়ে ঝরে,

ছেলেরা ভাসায় খেলার নৌকো,

কলস ভরে নেয় তরুণীরা

বুদ্বুদ কেনিল গর্গরধ্বনিতে ।

নব বর্ষার গম্ভীর বিরাট শ্যামমহিমা

তার বক্ষতলে পায় লীলাচঞ্চল দোসরটিকে ।

কালবৈশাখী হঠাৎ মারে পাখার ঝাপট,

স্থির জলে আনে অশান্তির উন্মত্তন,

অধৈর্যের আঘাত হানে তটবেষ্টনের স্থাবরতায়,

বুঝি তার মনে হয়

গিরিশিখরের পাগলা-ঝোরা পোষ মেনেছে

গিরিপদতলের বোবা জলরাশিতে ।

বন্দী ভুলেছে আপনার উদ্বেলকে উদ্দামকে ।

পাথর ডিঙিয়ে আপন সীমানা চূর্ণ করতে করতে

নিরুদ্দেশের পথে

অজ্ঞানার সংঘাতে বাঁকে বাঁকে

গর্জিত করল না সে আপন অপরূহ বাণী,

আবতে আবতে উৎক্লিষ্ট করল না

অন্তর্গতকে ।

মৃত্যুর গ্রন্থি থেকে ছিনিয়ে ছিনিয়ে

যে উদ্ধার করে জীবনকে

সেই রুদ্র মানবের আত্মপরিচয়ে বঞ্চিত

ক্লীণ পাণ্ডুর আমি

অপরিষ্কৃততার অসম্মান নিয়ে যাচ্ছি চলে ।

দুর্গম ভীষণের ওপারে

অন্ধকারে অপেক্ষা করছে জ্ঞানের বরদাত্রী ;

মানবের অভ্যভেদী বন্ধনশালা

তুলেছে কালো পাথরে গাঁথা উদ্ধত চূড়া

সূর্যোদয়ের পথে ;

বহু শতাব্দীর ব্যথিত ক্ষত মুষ্টি

রক্তলাঙ্ঘিত বিদ্রোহের ছাপ

লেপে দিয়ে যায় তার দ্বারফলকে ;

ইতিহাস-বিধাতার শ্রেষ্ঠ সম্পদ

দৈত্যের লৌহদুর্গে প্রচ্ছন্ন ;

আকাশে দেবসেনাপতির কণ্ঠ শোনা যায়—

এসো মৃত্যুবিজয়ী ;

বাজ্জ্বল ভেরী,

তবু জাগল না রণদুর্মদ

এই নিরাপদ নিশ্চেষ্ট জীবনে ;

বৃহ ভেদ ক'রে

স্থান নিইনি সুধ্যমান দেবলোকের সংগ্রাম-সহকারিতায় ।

কেবল স্বপ্নে শুনেছি ডমরুর গুরুগুরু,

কেবল সময়যাত্রীর পদপাতকম্পন

মিলেছে হৃৎস্পন্দনে বাহিরের পথ থেকে ।

যুগে যুগে যে মানুষের সৃষ্টি প্রলয়ের ক্ষেত্রে,

সেই আশানচরী ভৈরবের পরিচয়জ্যোতি

গ্লান হয়ে রইল আমার সন্ধ্যায়,

শুধু রেখে গেলেম নতমস্তকের প্রণাম  
 মানবের হৃদয়াসীন সেই বীরের উদ্দেশে,  
 মর্ত্যের অমরাবতী ঝাঁর সৃষ্টি  
 মৃত্যুর মূল্যে, জুংখের দীপ্তিতে ॥

১লা বৈশাখ, ১৩৪৩

---

## তেরো

হৃদয়ের অসংখ্য অদৃশ্য পত্রপুট  
 গুচ্ছে গুচ্ছে অঞ্জলি মেলে আছে  
 আমার চারদিকে চিরকাল ধ'রে,  
 আমি-বনস্পতির এরা কিরণ-পিপাসু পল্লবস্তবক,  
 এরা মাধুকরী ত্রতীর দল ।  
 প্রতিদিন আকাশ থেকে এরা ভরে নিয়েছে  
 আলোকের তেজোরস,  
 নিহিত করেছে সেই অলক্ষ্য অপ্রজ্বলিত অগ্নিসঞ্চয়  
 এই জীবনের গূঢ়তম মজ্জার মধ্যে ।  
 সুন্দরের কাছে পেয়েছে অমৃতের কণা  
 ফুলের থেকে, পাখির গানের থেকে,  
 প্রিয়ার স্পর্শ থেকে, প্রণয়ের প্রতিশ্রুতি থেকে,  
 আত্মনিবেদনের অশ্রুগদগদ আকৃতি থেকে,  
 মাধুর্যের কত স্মৃতিরূপ কত বিশ্বিতরূপ  
 দিয়ে গেছে অমৃতের স্বাদ  
 আমার নাড়ীতে নাড়ীতে ।  
 নানা ঘাতে প্রতিঘাতে সংকুঙ্ক  
 সুখদুঃখের ঝোড়ো হাওয়া নাড়া দিয়েছে  
 আমার চিস্তের স্পর্শবেদনাবাহিনী পাতায় পাতায় ।  
 লেগেছে নিবিড় হর্ষের অম্লকম্পন,

এসেছে লজ্জার ধিকার, ভয়ের সংকোচ, কলঙ্কের শ্রানি,  
জীবন-বহনের প্রতিবাদ ।

ভালোমন্দের বিচিত্র বিপরীত বেগ  
দিয়ে গেছে আন্দোলন  
প্রাণরস-প্রবাহে ।

তার আবেগে বয়ে নিয়ে গেছে সর্বগুণ চৈতন্যকে  
জগতের সর্বদান-যজ্ঞের প্রাক্ষণে ।  
এই চিরচঞ্চল চিন্ময় পল্লবের অশ্রুত মর্মরঞ্জন  
উধাও ক'রে দেয় আমার জাগ্রত স্বপ্নকে  
চিল-উড়ে-যাওয়া দূর দিগন্তে  
জনহীন মধ্যদিনে মোমাছির গুঞ্জন-মুখর অবকাশে ।  
হাতধ'রে-ব'সে-থাকা বাষ্পাকুল নির্বাক ভালবাসায়  
নেমে আসে এদেরই শ্রামল ছায়ার করুণা ।

এদেরই মৃদুবীজন এসে লাগে  
শয্যাপ্রান্তে নিদ্রিত দয়িতার  
নিশ্বাসক্ষুরিত বক্ষের চেলাঞ্চলে ।  
প্রিয়-প্রত্যাশিত দিনের চিরায়মান উৎকণ্ঠিত গ্রহরে  
শিহর লাগাতে থাকে এদেরই দোলায়িত কম্পনে ।

বিশ্বভুবনের সমস্ত ঐশ্বর্ষের সঙ্গে আমার যোগ হয়েছে  
মনোবৃক্ষের এই ছড়িয়ে-পড়া  
রসলোলুপ পাতাগুলির সংবেদনে ।

এরা ধরেছে সূক্ষ্মকে, বস্তুর অতীতকে ;

এরা তাল দিয়েছে সেই গানের ছন্দে

যার সুর যায় না শোনা ।

এরা নারীর হৃদয় থেকে এনে দিয়েছে আমার হৃদয়ে

প্রাণলীলার প্রথম ইন্দ্রজাল আদিযুগের,

অনন্ত পুরাতনের আত্মবিলাস

নব নব যুগলের মায়াক্রপের মধ্যে ।

এরা স্পন্দিত হয়েছে পুরুষের জয়শঙ্খধ্বনিতে

মর্ত্যলোকে যার আবির্ভাব

মৃত্যুর আলোকে আপন অমৃতকে উদ্ধারিত করবার জন্তে

হৃদ্যম উদ্ভমে,

জলস্থল আকাশপথে ছুর্গম জয়ের

স্পর্ধিত যার অধ্যবসায় ।

আজ আমার এই পত্রপুঞ্জের

ঝরঝর দিন এল জানি ।

সুধাই আজ অন্তরীক্ষের দিকে চেয়ে—

কোথায় গো সৃষ্টির আনন্দনিকেতনের প্রভু,

জীবনের অলক্ষ্য গভীরে

আমার এই পত্রদূতগুলির সংবাহিত দিনরাত্রির যে সঞ্চয়

অসংখ্য অপূর্ব অপরিমেয়

যা অখণ্ড ঐক্যে মিলে গিয়েছে আমার আত্মরূপে, •

যে রূপের দ্বিতীয় নেই কোনোখানে কোনো কালে,  
তাকে রেখে দিয়ে যাব কোন্ গুলীর কোন্ রসজ্জের  
দৃষ্টির সম্মুখে,  
কার দক্ষিণ করতলের ছায়ায়,  
অগণ্যের মধ্যে কে তাকে নেবে স্বীকার ক'রে।

শান্তিনিকেতন

১০ বৈশাখ, ১৩৪৩

---



## চোদ্দো

ওগো তরুণী,  
 ছিল অনেক দিনের পুরোনো বছরে  
 এমনি একখানি নতুন কাল,  
 দক্ষিণ হাওয়ায় দোলায়িত,  
 সেই কালেরই আমি ।  
 মুছে-আসা ঝাপসা পথ বেয়ে  
 এসে পড়েছি বনগন্ধের সংকেতে  
 তোমাদের এই আজকে-দিনের নতুন কালে ।  
 পারো যদি মেনে নিয়ো আমায় সখা ব'লে,  
 আর কিছু নয়, আমি গান জোগাতে পারি  
 তোমাদের মিলনরাতে  
 আমার সেই নিজাহারা সুদূর রাতের গান ;  
 তা'র সুরে পাবে দূরের নতুনকে,  
 তোমার লাগবে ভালো,  
 পাবে আপনাকেই  
 আপনার সীমানার অতীত পারে ।  
 সেদিনকার বসন্তের বাঁশিতে  
 লেগেছিল যে প্রিয়-বন্দনার তান,  
 আজ সঙ্গে এনেছি তাই,  
 সে নিয়ো তোমার অধিনিমীলিত চোখের পাতায়,  
 তোমার দীর্ঘনিঃশ্বাসে ।

আমার বিশ্বৃত বেদনার আভাসটুকু  
 বরা ফুলের মূছ গন্ধের মতো  
 রেখে দিয়ে যাব তোমার নব বসন্তের হাওয়ায় ।  
 সেদিনকার ব্যথা  
 অকারণে বাজবে তোমার বুকে ;  
 মনে বুঝবে, সেদিন তুমি ছিলে না তবু ছিলে,  
 নিখিল যৌবনের রঙ্গভূমির নেপথ্যে  
 যবনিকার ওপারে ।

ওগো চিরস্তুনী,  
 আজ আমার বাঁশি তোমাকে বলতে এল,—  
 যখন তুমি থাকবে না তখনো তুমি থাকবে আমার গানে  
 ডাকতে এলেম আমার হারিয়ে-যাওয়া পুরোনোকে  
 তা'র খুঁজে-পাওয়া নতুন নামে ।  
 হে তরুণী,  
 আমাকে মেনে নিয়ো তোমার সখা ব'লে,  
 তোমার অন্তঃকরণের সখা ॥

শান্তিনিকেতন  
 ১৯ বৈশাখ, ১৩৪৩

## পনেরো

ওরা অন্ত্যজ, ওরা মন্তবজিত ।  
 দেবালয়ের মন্দির-দ্বারে  
 পূজা-ব্যবসায়ী ওদের ঠেকিয়ে রাখে ।  
 ওরা দেবতাকে খুঁজে বেড়ায় তাঁর আপন স্থানে  
 সকল বেড়ার বাইরে  
 সহজ ভক্তির আলোকে,  
 নক্ষত্রখচিত আকাশে,  
 পুষ্পখচিত বনস্থলীতে,  
 দোসর-জন্য মিলন বিরহের  
 গহন বেদনায় ।  
 যে দেখা বানিয়ে-দেখা বাঁধা ছাঁচে,  
 প্রাচীর ঘিরে' ছুয়ার তুলে',  
 সে দেখার উপায় নেই ওদের হাতে ।  
 কতদিন দেখেছি ওদের সাধককে  
 একলা প্রভাতের রৌদ্রে সেই পদ্মানদীর ধারে,  
 যে নদীর নেই কোনো দ্বিধা  
 পাকা দেউলের পুরাতন ভিত ভেঙে ফেলতে ।  
 দেখেছি একতারা হাতে চলেছে গানের ধারা বেয়ে  
 মনের মানুষকে সন্ধান করবার  
 গভীর নির্জন পথে ।

কবি আমি ওদের দলে,—

আমি ভ্রাত্য, আমি মস্ত্রহীন,

দেবতার বন্দীশালায়

আমার নৈবেদ্য পৌঁছল না ।

পূজারী হাসিমুখে মন্দির থেকে বাহির হয়ে আসে,

আমাকে সুধায়, “দেখে এলে তোমার দেবতাকে ?”

আমি বলি, “না ।”

অবাক হয় শুনে, বলে “জানা নেই পথ ?”

আমি বলি,—“না ।”

প্রশ্ন করে, “কোনো জাত নেই বুঝি তোমার ?”

আমি বলি, “না ।”

এমন ক’রে দিন গেল ;

আজ আপন মনে ভাবি,—

“কে আমার দেবতা,

কার করেছি পূজা ।

শুনেছি ষাঁর নাম মুখে মুখে,

পড়েছি ষাঁর কথা নানা ভাষায় নানা শাস্ত্রে,

কল্পনা করেছি তাঁকেই বুঝি মানি ।

তিনিই আমার বরণীয় প্রমাণ করব বলে

পূজার প্রয়াস করেছি নিরন্তর ।

আজ দেখেছি প্রমাণ হয় নি আমার জীবনে ।

কেননা, আমি ভ্রাত্য আমি মস্ত্রহীন ।

মন্দিরের রুদ্ধদ্বারে এসে আমার পূজা  
 বেরিয়ে চলে গেল দিগন্তের দিকে,—  
 সকল বেড়ার বাইরে,  
 নক্ষত্রখচিত আকাশতলে,  
 পুষ্পখচিত বনস্থলীতে,  
 দোসর-জন্য মিলন বিরহের  
 বেদনা-বন্ধুর পথে ।

বালক ছিলাম যখন

পৃথিবীর প্রথম জন্মদিনের আদি মন্ত্ৰটি  
 পেয়েছি আপন পুলককম্পিত অন্তরে,—  
 আলোর মন্ত্ৰ ।

পেয়েছি নারকেল শাখার ঝালর-ঝোলা  
 আমার বাগানটিতে,  
 ভেঙে-পড়া শ্রাওলা-ধরা পাঁচিলের উপর  
 একলা বসে ।

প্রথম প্রাণের বহ্নি-উৎস থেকে  
 নেমেছে তেজোময়ী লহরী,  
 দিয়েছে আমার নাড়ীতে  
 অনির্বচনীয়ের স্পন্দন ।  
 আমার চৈতন্যে গোপনে দিয়েছে নাড়া  
 অনাদিকালের কোন্ অস্পষ্ট বাতী,  
 প্রাচীন সূর্যের বিরাট বাষ্পদেহে বিলীন  
 আমার অব্যক্ত সত্তার রশ্মিস্ফুরণ ।

হেমন্তের রিক্তশস্ত্র প্রাস্তরের দিকে চেয়ে  
 আলোর নিঃশব্দ চরণধ্বনি  
 শুনেছি আমার রক্ত-চাকল্যে ।  
 সেই ধ্বনি আমার অহুসরণ করেছে  
 জন্মপূর্বের কোন্ পুরাতন কালযাত্রা থেকে ।  
 বিশ্বয়ে আমার চিত্ত প্রসারিত হয়েছে অসীমকালে  
 যখন ভেবেছি  
 সৃষ্টির আলোক-তীর্থে  
 সেই জ্যোতিতে আজ আমি জাগ্রত  
 যে জ্যোতিতে অযুত নিযুত বৎসর পূর্বে  
 স্রুপ্ত ছিল আমার ভবিষ্যৎ ।  
 আমার পূজা আপনিই সম্পূর্ণ হয়েছে প্রতিদিন  
 এই জাগরণের আনন্দে ।  
 আমি ব্রাত্য আমি মন্ত্রহীন,  
 রীতিবন্ধনের বাহিরে আমার আত্মবিস্মৃত পূজা  
 কোথায় হোলো উৎসৃষ্ট জানতে পারিনি ।

যখন বালক ছিলাম ছিল না কেউ সাথী,  
 দিন কেটেছে একা একা  
 চেয়ে চেয়ে দূরের দিকে ।  
 জন্মেছিলাম অনাচারের অনাদৃত সংসারে,  
 চিহ্ন-মোছা, প্রাচীরহারা ।  
 প্রতিবেশীর পাড়া ছিল ঘন বেড়ায় ঘেরা,  
 আমি ছিলাম বাইরের ছেলে, নাম-না-জানা ।

ওদের ছিল তৈরি বাসা, ভিড়ের বাসা,—

ওদের বাঁধা পথের আসা-যাওয়া

দেখেছি দূরের থেকে

আমি ব্রাত্য, আমি পংক্তিহারা ।

বিধান-বাঁধা মানুষ আমাকে মানুষ মানেনি,

তাই আমার বন্ধুহীন খেলা ছিল সকল পথের চৌমাথায়,

ওরা তার ও পাশ দিয়ে চলে গেছে

বসনপ্রাস্ত তুলে' ধ'রে ।

ওরা তুলে নিয়ে গেল ওদের দেবতার পূজায়

শাস্ত্র মিলিয়ে বাছা-বাছা ফুল,

রেখে দিয়ে গেল আমার দেবতার জন্তে

সকল দেশের সকল ফুল,

এক সূর্যের আলোকে চিরস্বীকৃত ।

দলের উপেক্ষিত আমি,

মানুষের মিলন-সুধায় ফিরেছি,

যে মানুষের অতিথিশালায়

প্রাচীর নেই, পাহারা নেই ।

লোকালয়ের বাইরে পেয়েছি আমার নিজ'নের সঙ্গী

যারা এসেছে ইতিহাসের মহাযুগে

আলো নিয়ে, অস্ত্র নিয়ে, মহাবাহী নিয়ে ।

তারা বীর, তারা তপস্বী, তারা মৃত্যুঞ্জয়,

তারা আমার অন্তরঙ্গ, আমার স্ববর্ণ, আমার স্বগোত্র,

তাদের নিত্য শুচিতায় আমি শুচি ।

তারা সত্যের পথিক, জ্যোতির সাধক,

অমৃতের অধিকারী ।

মানুষকে গভীর মধ্যে হারিয়েছি  
 মিলেছে তার দেখা  
 দেশবিদেশের সকল সীমানা পেরিয়ে ।  
 তাকে বলেছি হাত জোড় ক'রে,—  
 হে চিরকালের মানুষ, হে সকল মানুষের মানুষ,  
 পরিজ্ঞাণ করো—  
 ভেদচিহ্নের তিলক-পরা  
 সংকীর্ণতার ঔদ্ধত্য থেকে ।  
 হে মহান পুরুষ, ধন্য আমি, দেখেছি তোমাকে  
 তামসের পরপার হতে  
 আমি ব্রাত্য, আমি জাতিহারা ।

একদিন বসন্তে নারী এল সঙ্গীহারা আমার বনে  
 প্রিয়ার মধুর রূপে ।  
 এল সুর দিতে আমার গানে,  
 নাচ দিতে আমার ছন্দে,  
 সুধা দিতে আমার স্বপ্নে ।  
 উদ্দাম একটা ঢেউ হৃদয়ের তট ছাপিয়ে  
 হঠাৎ হোলো উচ্ছলিত,  
 ডুবিয়ে দিল সকল ভাষা,  
 নাম এল না মুখে ।  
 সে দাঁড়াল গাছের তলায়,  
 ফিরে তাকাল আমার কুণ্ঠিত বেদনাকরণ  
 মুখের দিকে ।  
 স্বরিত পদে এসে বসল আমার পাশে ।



ছুই হাতের মধ্যে আমার হাত তুলে নিয়ে বললে,—  
 “তুমি চেনো না আমাকে, তোমাকে চিনিনে আমি,  
 আজ পর্যন্ত কেমন ক’রে এটা হোলো সম্ভব  
 আমি তাই ভাবি।”

আমি বললেম, “ছুই না-চেনার মাঝখানে  
 চিরকাল ধ’রে আমরা ছুজনে বাঁধব সেতু,  
 এই কোতুহল সমস্ত বিশ্বের অন্তরে।”

ভালবেসেছি তাকে।

সেই ভালবাসার একটা ধারা  
 ঘিরেছে তাকে স্নিগ্ধ বেষ্টিনে  
 গ্রামের চিরপরিচিত অগভীর নদীটুকুর মতো।  
 অল্পবেগের সেই প্রবাহ  
 বাহে চলেছে প্রিয়ার সামান্য প্রতিদিনের  
 অল্পটু তটচ্ছায়ায়।  
 অনাবৃষ্টির কার্পণ্যে কখনো সে হয়েছে ক্ষীণ  
 আঘাটের দাক্ষিণ্যে কখনো সে হয়েছে প্রগল্ভ।  
 তুচ্ছতার আবরণে অল্পজ্বল  
 অতি সাধারণ স্ত্রী-স্বরূপকে  
 কখনো করেছে লালন, কখনো করেছে পরিহাস,  
 আঘাত করেছে কখনো বা।

আমার ভালবাসার আর একটা ধারা  
 মহাসমুদ্রের বিরাট ইজিতবাহিনী।  
 মহীয়সী নারী স্নান ক’রে উঠেছে  
 তারি অভল থেকে।

সে এসেছে অপরিসীম ধ্যানরূপে  
 আমার সর্বদেহমনে,  
 পূর্ণতর করেছে আমাকে, আমার বাণীকে ।  
 জ্বলে রেখেছে আমার চেতনার নিভৃত গভীরে  
 চির বিরহের প্রদীপশিখা ।  
 সেই আলোকে দেখেছি তাকে অসীম ত্রীলোকে,  
 দেখেছি তাকে বসন্তের পুষ্পপল্লবের প্লাবনে,  
 সিন্ধুগাছের কাঁপনলাগা পাতাগুলির থেকে  
 ঠিকরে পড়েছে যে রোদ্রকণা  
 তার মধ্যে শুনেছি তা'র সেতারের দ্রুতঝংকৃত সুর ।  
 দেখেছি ঋতুরঙ্গভূমিতে  
 নানা রঙের ওড়না-বদল-করা তার নাচ  
 ছায়ায় আলোয় ।

ইতিহাসের সৃষ্টি-আসনে  
 ওকে দেখেছি বিধাতার বামপাশে ;  
 দেখেছি সুন্দর যখন অবমানিত  
 কদর্য কঠোরের অশুচিস্পর্শে  
 তখন সেই রুদ্রাণীর তৃতীয় নেত্র থেকে  
 বিচ্ছুরিত হয়েছে প্রলয়-অগ্নি,  
 ধ্বংস করেছে মহামারীর গোপন আশ্রয় ।

আমার গানের মধ্যে সঞ্চিত হয়েছে দিনে দিনে  
 সৃষ্টির প্রথম রহস্য,—আলোকের প্রকাশ,  
 আর সৃষ্টির শেষ রহস্য,—ভালবাসার অমৃত ।

আমি ব্রাত্য, আমি মস্তাহীন  
 সকল মন্দিরের বাহিরে  
 আমার পূজা আজ সমাপ্ত হোলো  
 দেবলোক থেকে  
 মানবলোকে,  
 আকাশে জ্যোতির্ময় পুরুষে  
 আর মনের মানুষে আমার অন্তরতম আনন্দে ।

শান্তিনিকেতন,  
 ১৮ বৈশাখ, ১৩৪৩ ।

---

## ষোলো

উদ্ভাস্ত সেই আদিম যুগে

অষ্টা যখন নিজের প্রতি অসন্তোষে

নতুন সৃষ্টিকে বার-বার করছিলেন বিশ্বস্ত,

তার সেই অধৈর্যে ঘন-ঘন মাথা-নাড়ার দিনে

রুদ্র সমুদ্রের বাহু

প্রাচী ধরিত্রীর বুকের থেকে

ছিনিয়ে নিয়ে গেল তোমাকে, আফ্রিকা,

বাঁধলে তোমাকে বনস্পতির নিবিড় পাহারায়

কৃপণ আলোর অন্তঃপুরে।

সেখানে নিভৃত অবকাশে তুমি

সংগ্রহ করছিলে দুর্গমের রহস্য,

চিনছিলে জলস্থল আকাশের ছবোঁধ সংকেত,

প্রকৃতির দৃষ্টি-অতীত জাহ্ন

মন্ত্র জাগাচ্ছিল তোমার চেতনাতীত মনে।

বিজ্ঞপ করছিলে ভীষণকে

বিরূপের ছদ্মবেশে,

শব্দকে চাচ্ছিলে হার মানাতে

আপনাকে উগ্র ক'রে বিভীষিকার প্রচণ্ড মহিমায়

তাণ্ডবের হৃন্দুভি নিনাদে।

হায় ছায়াবৃত্তা,

কালো ঘোমটার নিচে

অপরিচিত ছিল তোমার মানবরূপ

উপেক্ষার আবিল দৃষ্টিতে ।

এল ওরা লোহার হাতকড়ি নিয়ে

নখ যাদের ভীক্স তোমার নেকড়ের চেয়ে,

এল মামুষ-ধরার দল,

গবেঁ যারা অন্ধ তোমার সূর্যহারা অরণ্যের চেয়ে ।

সভ্যের বর্বর লোভ

নগ্ন করল আপন নিলজ্জ অমামুষতা ।

তোমার ভাষাহীন ক্রন্দনে বাষ্পাকুল অরণ্যপথে

পঙ্কিল হোলো ধূলি তোমার রক্তে অশ্রুতে মিশে ;

দস্যু-পায়ের কাঁটা-মারা জুতোর তলায়

বীভৎস কাদার পিণ্ড

চিরচিহ্ন দিয়ে গেল তোমার অপমানিত ইতিহাসে ॥

সমুদ্রপারে সেই মূহূর্তেই তাদের পাড়ায় পাড়ায়

মন্দিরে বাজছিল পূজার ঘণ্টা

সকালে সন্ধ্যায়, দয়াময় দেবতার নামে ;

শিশুরা খেলছিল মায়ের কোলে ;

কবির সংগীতে বেজে উঠছিল

সুন্দরের আরাধনা ।

আজ যখন পশ্চিম দিগন্তে

প্রদোষকাল ঝঞ্জাবাতাসে রুদ্ধশ্বাস,

যখন গুপ্তগহ্বর থেকে পশুরা বেরিয়ে এল,

অশুভ ধ্বনিতে ঘোষণা করল দিনের অন্তিমকাল,

এসো যুগান্তরের কবি

আসন্ন সঙ্ক্যার শেষ রশ্মিপাতে  
দাঁড়াও ঐ মান-হারা মানবীর দ্বারে,  
বলো, ক্ষমা করো,—  
হিংস্র প্রলাপের মধ্যে  
সেই হোক তোমার সভ্যতার শেষ পুণ্যবাণী ।

শান্তিনিকেতন

২৮ মাঘ, ১৩৪৩

---

## সতেরো

যুদ্ধের দামামা উঠল বেজে ।  
 ওদের ঘাড় হোলো বাঁকা, চোখ হোলো রাঙা,  
 কিড়মিড় করতে লাগল দাঁত ।  
 মানুষের কাঁচা মাংসে যমের ভোজ্য ভরতি করতে  
 বেরোল দলে দলে ।  
 সবার আগে চলল দয়াময় বুদ্ধের মন্দিরে  
 তাঁর পবিত্র আশীর্বাদের আশায় ।  
 বেজে উঠল তুরী ভেরী গরগর শব্দে,  
 কেঁপে উঠল পৃথিবী ।  
 ধূপ জ্বলল, ঘণ্টা বাজল, প্রার্থনার রব উঠল আকাশে,  
 করুণাময়, সফল হয় যেন কামনা—  
 কেননা ওরা যে জাগাবে মর্মভেদী আর্তনাদ  
 অভ্রভেদ ক'রে,  
 ছিঁড়ে ফেলবে ঘরে ঘরে ভালবাসার বাঁধনসূত্র,  
 ধ্বজা তুলবে লুপ্তপল্লীর ভস্মস্বপ্নে,  
 দেবে ধুলোয় লুটিয়ে বিছানিকেতন,  
 দেবে চুরমার ক'রে সুন্দরের আসনপীঠ ।  
 তাইতো চলেছে ওরা দয়াময় বুদ্ধের নিতে আশীর্বাদ ।  
 বেজে উঠল তুরী ভেরী গরগর শব্দে,  
 কেঁপে উঠল পৃথিবী ।

ওরা হিসাব রাখবে ম'রে পড়ল কত মানুষ,

পঙ্খ হয়ে গেল কয়জন।

তারি হাজার সংখ্যার তালে তালে

ঘা মারবে জয়ডঙ্কায়।

পিশাচের অটুহাসি জাগিয়ে তুলবে

শিশু আর নারীদেহের ছেঁড়া টুকরোর ছড়াছড়িতে।

ওদের এই মাত্র নিবেদন, যেন বিশ্বজনের কানে পারে

মিথ্যামন্ত্র দিতে,

যেন বিষ পারে মিশিয়ে দিতে নিঃশ্বাসে।

সেই আশায় চলেছে ওরা দয়াময় বুদ্ধের মন্দিরে

নিতে তাঁর প্রসন্ন মুখের আশীর্বাদ।

বেজে উঠছে তুরী ভেরী গরগর শব্দে,

কৈপে উঠছে পৃথিবী ॥

শান্তিনিকেতন

পৌষ, ১৩৪৪

---



## আঠারো।

কথার উপরে কথা চলেছ সাজিয়ে দিনরাতি,  
 এইবার থামো তুমি। বাক্যের মন্দিরচূড়া গাঁথি'  
 যত উত্থে' তোলো তা'রে তা'র চেয়ে আরো উত্থে' ধায়  
 গাঁথুনির অন্তহীন উন্নততা। থামিতে না চায়  
 রচনার স্পর্শ। তব। ভুলে গেছ, থামার পূর্ণতা  
 রচনার পরিত্রাণ ; ভুলে গেছ নির্বাক দেবতা  
 বেদীতে বসিবে আসি' যবে, কথার দেউলখানি  
 কথার অতীত মৌনে লভিবে চরমতম বাণী।  
 মহা নিস্তকের লাগি অবকাশ রেখে দিয়েো বাকি,  
 উপকরণের স্তূপে রচিয়েো না অভভেদী ফাঁকি  
 অমৃতের স্থান রোধি'। নির্মাণ-নেশায় যদি মাতো  
 সৃষ্টি হবে গুরুভার তার মাঝে লীলা র'বে না তো।  
 থামিবার দিন এলে থামিতে না যদি থাকে জানা  
 নীড় গঁথে গঁথে পাখি আকাশেতে উড়িবার ডানা  
 ব্যর্থ করি' দিবে। থামো তুমি থামো। সজ্জা হয়ে আসে  
 শাস্তির ইজিত নামে দিবসের প্রগল্ভ প্রকাশে।  
 ছায়াহীন আলোকের সভায় দিনের যত কথা  
 আপনারে রিস্ত করি' রাত্রির গভীর সার্থকতা

এসেছে ভরিয়া নিতে । তোমার বীণার শত তারে  
 মন্ততার নৃত্য ছিল এতক্ষণ ঝংকারে ঝংকারে  
 বিরাম বিজ্রামহীন,—প্রত্যক্ষের জনতা তেয়োগি'  
 নেপথ্যে যাক সে চ'লে স্মরণের নির্জনের লাগি'  
 ল'য়ে তা'র গীত অবশেষ, কথিত বাণীর ধারা  
 অসীমের অকথিত বাণীর সমুজ্জ্বল হোক সারা ॥

শান্তিনিকেতন

৫ই বৈশাখ, ১৩৪৩

---







